

სრულიად საქართველოს კათოლიკოს-პატრიარქის ქადაგება სვეტიცხოვლობის დღესასწაულზე (14.10.2018)



სახელითა მამისათა და ძისათა და წმინდისა სულისათა

ჩვენთან არს ღმერთი

დღეს არის ჩვენი უდიდესი ეროვნული დღესასწაული, _ მცხეთობა, სვეტიცხოვლობა. ყველას გილოცავთ ამ ზეიმს. სიხარული და მწუხარება ენაცვლებიან ერთმანეთს როგორც ტყუპი ძმები და ბევრი რამ უნახავს სვეტიცხოველს და მცხეთას _ კარგიც და მძიმეც.

ჩვენს წინაპრებს უთქვამთ: ადამიანმა, რომ აიღოს მიწა და გამოწეროს, მოწამეების სისხლი გამოედინებაო მას. მაგრამ, ამავე დროს, დიდი მადლი ტრიალებს ამ წმინდა ადგილზე. აქ ხდებოდა მეფის კურთხევა, აქ ხდებოდა და ხდება პატრიარქებისა და ეპისკოპოსების კურთხევა.

მცხეთა განსაკუთრებული ქალაქია და განსაკუთრებული ადგილი. ქრისტეს შობამდე ექვსი საუკუნით ადრე იყო ჩამოტანილი აქ ხალენი წმინდა ილია წინასწარმეტყველისა, მაგრამ ეს იმას არ ნიშნავს, რომ იმ დროს დაიწყო ურთიერთობა ებრაელებსა და ქართველებს შორის. ეს გაცილებით ადრე დაიწყო. უცხო ქვეყანაში არ წაიღებდნენ ისინი ამ დიდ სიწმინდეს.

შემთხვევით არ არის, რომ აქ იყო ჩამოტანილი კვართი უფლისა ჩვენისა იესო ქრისტესი. ისაც არ არის შემთხვევითი, რომ საქართველო გახდა წილხვედრი ყოვლადწმინდისა ღვთისმშობლისა. ყველაფერი მეთყველებს იმის შესახებ, რომ მცხეთა არის ახალი იერუსალიმი, წმინდა ქალაქი და ჩვენ თაყვანსა ვცემთ ამ წმინდა ადგილს.

გარდაცვალების წინ მეფე მირიანმა უარი თქვა დასაფლავებულიყო სვეტიცხოვლის ადგილას. ის თვლიდა უღირსად თავის თავს, რომ აქ მომხდარიყო მისი დაკრძალვა და დაიკრძალა სამეფო ბაღში, სადაც ახლა არის სამთავროს დედათა მონასტერი.

ჩვენ ბედნიერი ვართ, რომ ღმერთმა გვიბოძა ეს სამშობლო.

ჩვენ მოხარულნი ვართ, რომ ამ ბედნიერ დღეს ჩვენ გვესწრება პრემიერ-მინისტრი საქართველოსი, მერი თბილისისა და სხვა თანამდებობის პირები. გილოცავთ ამ დიდებულ დღესასწაულს, მაღლი უფლისა გფარავდეთ თქვენ და საქართველოს.

აწყურის ღვთისმშობლის ხატმა მოიარა მთელი საქართველო, ამიტომ ჩვენ ერთად ვთქვათ ლოცვა „მონაწილეთა კარი განგვიღე“.

„მონაწილეთა კარი განგვიღე კურთხეულო ღვთისმშობელო, რათა რომელნი ესე შენ გესავთ არა დავცნეთ, არამედ განვერნეთ წინააღმდეგომთა მტერთაგან რამეთუ შენ ხარ ცხოვრება ნათესავისა ქრისტიანეთასა. ამინ!“

დღეს ჩვენ შევთხოვთ უფალს რომ მაღლითა სვეტისაცხოველისა, ღმერთმა მოგვცეს მშვიდობა, სიხარული, სიყვარული, მთლიანობა საქართველოდსა.

მინდა ვთხოვო პრემიერ-მინისტრს, მიულოცოს ხალხს ეს დიდებული დღესასწაული.

საქართველოს პრემიერ-მინისტრი მამუკა ბახტაძე

თქვენო უწმინდესობავ, ძვირფასო მეგობრებო, მინდა მთელს მართლმადიდებლურ სამყაროს, ჩვენს მრავალ ეთნიკურ ერს, განსაკუთრებით კი ჩვენს ემიგრანტებს მივულოცო სვეტიცხოველობა დღევანდელი დღე. სვეტიცხოველი არის სიმბოლო ჩვენი ერის სულიერი სიმტკიცისა და ამავე დროს ეს არის სიმბოლო ქართველი ადამიანის განსაკუთრებული ნიჭისა. ღმერთმა დალოცოს საქართველო.

სრულიად საქართველოს კათოლიკოს-პატრიარქი

კიდევ ერთხელ გილოცავთ ამ დიდებულ დღესასწაულს. წყალობა და მშვიდობა
სუფევდეს თქვენთან და საქართველოში და მთელს მსოფლიოში. ჩვენთან არს ღმერთი.





